

1599

addentibus, Leonardus Donatus, Marcius Procurator, ne inauditus dimittatur, suadet; tum ne spreta Ferdinandi legatio videatur, tum quod inde nullum Respublica detrimentum accipiat; rem integram in Patrum potestate fore. Duobus itaque ex Patrum numero, Jacobo nempe Fuscarenno, ac Zachariæ Contarenno, ut, Rebata audito, ad Senatum referant, præcipitur.

*Jacobus Fuscarenus, & Zacharias Contarenus, ad Uscochorum negotia cum Rebata transiendi.*

Interea Italici externi pedites difficulter conscribuntur. Prorex Neapolitanus, atque Insulbrum gubernator, nova Ferdinandi affinitate Regis causam agi, rati, in suis ditionibus milites pro Venetis deligi vetant. Sueffanus legatus, ut idem Itali Principes efficiant, enititur. Clemens quoque, severissimis edictis extrahi ex pontificiis ditionibus pedites, prohibet; Ferrariæ ob id præfecti aliquot Veneti carcere inclusi. Pontifex ipse nihil adversum Reipublicæ agere affirmat; sibi in neutram propendere partem constitutum; a subjectis imperio suo bellum inter christianos Principes ali, prosperos Pannoniæ eventus interturbari nolle. Verumtamen cum summi esse rem momenti, atque justissima in causa Reipublicæ favere æquum arbitraretur; præter literas, quas ad Cæsarem atque Archiducem vehementes dederat, Flaminium quoque Delphinum, virum rei militaris usu præstantem, ad Rodolphum mittere statuit; ut aliquod præsentibus molestiis a Cæsare remedium omni officio afferri contenderet. At minores Italiæ Principes vel metu vel Hispanorum nexu aliorum exemplum sequuntur. Mutinensis præfectos aliquot in suis finibus milites cogere adnixos, in Brixillo oppido custodiæ tradi jubet; Urbinas non modo milites pernegat, sed alibi conscriptis per suos fines transitu interdicat; Patrum officiis cum Brunetto abbate, ejus internuntio, ne quidquam adhibitis, qui responsum se ab Duce retulisse affirmabat, vigere quidem in eo jam inde a majoribus acceptam eximiam in Rempublicam nomenque Venetum observantiam; sed quominus ea in re satisfaceret, Principum ac præsertim Hispanorum officiis impediri; quod de Ferdinando, sororio Philippi, agatur, cui nuper quindecim millium aureorum pensione (duodecim, quæ a Philippo secundo patre persolvebantur, tribus additis) devinctus esset. Rainutius tantum, Parmæ

*Flaminius Delphinus ob Uscochorum negotium in Germaniam a Pontifice missus.*